

Evening Dogri (NSD) Bulletin 13-05-2025

आकाशवाणी

खबरां

- विदेश मंत्रालय नै आखेआ जे केंद्र शासित प्रदेश जम्मू-कश्मीर कन्नै जुडे दे कुसै बी मुद्दे पर भारत दे रूख च कोई बदलाव नेई। इनें मुद्दे गी दौनें मुल्ले गी दपक्खी रूपै नै सुलझाना होगा।
- प्रधानमंत्री नरेंद्र मोदी होरें आखेआ जे भारत आतंकवादिये गी उन्दे घरें च बड़िये उनेंगी खत्म करने दी छमता रखदा ऐ।
- रक्षा खुफिया एजेंसी दे महानिदेशक होरें 70 देशे गी आपरेशन सिंदूर दे सफल संचालन दे बारे जानकारी दिती।
- आपरेशन सिंदूर उप्पर अज्ज थमां 11 दिनें दा राष्ट्रव्यापी संपर्क अभियान शुरू कीता गेआ।
- जम्मू-कश्मीर दे शोपियां जिले च सुरक्षाबले ते आतंकवादिये बश्कार टाकरे च त्रै आतंकवादी मारी मकाए गे।

<><><><><><>

EAM-Briefing

विदेश मंत्रालय नै आखेआ ऐ जे केंद्र शासित प्रदेश जम्मू-कश्मीर कन्नै जुडे दे कुसै बी मुद्दे पर भारत दा रूख लम्मे चिर थमां कायम ऐ। उनें आखेआ जे इनें मुद्दे गी भारत ते पाकिस्तान गी दपक्खी रूपै नै सुलझाना होगा। नमीं दिल्ली च संवाददाता सम्मेलन च इक सुआल दे परते च विदेश मंत्रालय दे प्रवक्ता रंधीर जयसवाल होरें आखेआ जे इस मामले पर भारत दी नीति च कोई बदलाव नेई आया ऐ। उनें आखेआ जे लंबित मुद्दा पाकिस्तान आस्सेआ अवैध रूपै नै कब्जाए गेदे भारतीय खेत्तर गी खाली करना ऐ।

<><><><><><>

PM-Adampur

प्रधानमंत्री नरेंद्र मोदी होंरें अज्ज बड्डलै पंजाब दे आदमपुर च ब्हाई फौज दे केंद्र दा दौरा कीता ते वीर जवानें कन्नै गल्लबात कीती। गल्लबात दौरान उनें जवानें दी दलेरी दी सराहना करदे होई उंदा दिल बधाया। इक सोशल मीडिया पोस्ट च मोदी होंरें आखेआ जे हिम्मत, दलेरी, निडरता ते पक्के धेइये दी मसाल जवानें च जाइयै उनेंगी मता गौऽ मसूस होआ करदा ऐ। उनें आखेआ जे स्हाड़े थेआरबंद बल मुलखै लेई जेहड़ा किश बी करदे न, देश सदा उन्दे लेई आभारी रौहगा। प्रधानमंत्री हुंदा एहू दौरा पहलगाम आतंकी हमले दे बाद शुरू कीते गेदे आपरेशन सिंदूर दी कामयाबी दे सिलसिले च हा। भारत नै इस आपरेशन तैहत पाकिस्तान ते पाकिस्तान दे नजैज कब्जे आहले जम्मू-कश्मीर च केई आतंकी ठकानें ते कैपें गी तबाह करी दित्ता ते इस कार्रवाई च 100 कोला मते आतंकवादी मारे गेन।

<><><><><><>

PM-Adampur

आदमपुर च सैनिकें कन्नै गल्लबात करदे होई प्रधानमंत्री होंरें आखेआ ऐ जे आतंकी ठकानें पर हमला करियै भारत नै इक सख्त संदेश दित्ता ऐ। उनें आखेआ जे आपरेशन सिंदूर नै छड़े आतंकी ठकानें गै तबाह नेई कीते सगुआं आतंकिएं दे भैडे मन्सूबें दी बी पस्त करी दित्ता ऐ। उनें गलाया जे भारत माता दी जय ओ धेइया ऐ जेड़ा हर जवान गी भारत मा दी रक्षा लेई अपना सब किश बलिदान करी देने लेई तैयार रखदा ऐ ते छड़ा सैनिक गै नेई कोई बी भारतवासी जिसलै “भारत माता की जय” दा नारा लांदा ऐ तां उनें अपने आपै गी मातृभूमि दी रक्षा लेई किश बी करने लेई तैयार होई जंदा ऐ।

<><><><><><>

Rajnath-Meeting

रक्षा मंत्री राजनाथ सिंह होंरें अज्ज नमीं दिल्ली च इक उच्चि सतह दी बैठक दौरान भारत दे पच्छमी बन्ने पर सुरक्षा स्थिति दी समीक्षा कीती। बैठका च प्रमुख रक्षा अध्यक्ष सी.डी.एस जनरल अनिल चौहान, नौसेना प्रमुख एडमिरल दिनेश के त्रिपाठी, सेना प्रमुख जनरल उपेंद्र द्विवेदी ते वायु सेना दे

उपप्रमुख एयर मार्शल नर्मदेश्वर तिवारी बी शामिल होए। उन्दे अलावा रक्षा सचिव राजेश कुमार सिंह होर बी बैठका च मजूद हे।

<><><><><><>

VP

उपराश्ट्रपति जगदीप धनखड़ होरें अज्ज पूर्वोत्तर राज्यें गी देसै लेई मता महत्वपूर्ण दस्सेआ। नमीं दिल्ली च गारो, खासी ते जैंतिया हिल्स खेत्तरें दा प्रतिनिधित्व करने आहले मेघालय दे आम मदादी समूहें दे सदस्यें नै गल्लबात च श्री धनखड़ होरें आखेआ जे मेघालय दे सकल घरेलू उत्पाद च 13 फीसद बाद्दा होआ ऐ। उनें लुक ईस्ट, एक्ट ईस्ट नीति दे तैहत प्रगति दे बारे च च बी दस्सेआ। उनें आखेआ जे राज्य च सैलसफा, खनन, आई.टी, सेवा क्षेत्र सने होरनें खेत्तरें च अपार प्रतिभा ते संभावना ना।

<><><><><><>

Flights Cancelled

एयर इंडिया नै आखेआ ऐ जे यात्रियें दी सुरक्षा दे मद्देनजर जम्मू, लेह, जोधपुर, अमृतसर, बुझ, मामनगर, चंडीगढ़ ते राजकोट थमां औने जाने आहली डुआरी सेवा अज्ज लेई रद्द कीती गेई। इक सोशल मीडिया पोस्ट च एयर इंडिया नै आखेआ जे स्थिति दी निगरानी कीती जा रदी ऐ ते एहदे बारे च यात्रियें गी तुरत सूचित कीता जाग। मती जानकारी लेई यात्री एयरलाइन कन्नै संपर्क करी सकदे न ते वेबसाइट दिक्खी सकदे न।

<><><><><><>

DG-Defence

रक्षा खुफिया एजेंसी दे महानिदेशक लेफ्टिनेंट जनरल डी.एस राणा होरें 70 देशें गी आपरेशन सिंदूर दे सफल संचालन दे बारे च जानकारी दित्ती। उनें नमें युग दे युद्ध च फौजी श्रेष्ठता राएं प्रदर्शित कीती गेदी देश दी शक्ति ते राष्ट्रीय संकल्प पर लो पाई। लेफ्टिनेंट जनरल राणा होरें पुष्टि कीते गेदे आतंकवादी लक्ष्यें दे चयन लेई विस्तृत योजना प्रक्रिया दे बारे च उनेंगी विस्तार नै दस्सेआ। उनें भारतीय सशस्त्र बलें आसेआ गहन अभियान राहें लक्ष्यें गी हासल करने लेई एकीकृत, सटीक ते तेज प्रक्रिया पर बी लो पाई। महानिदेशक राणा होरें बरोधी आसेआ चलाए जा रदे भारत बरोधी दुष्प्रचार अभियान ते श्रेत्रीय शांति ते स्थिरता पर एहदे प्रभावें दा विश्वसनीय रिकार्ड बी पेश कीता।

<><><><><><>

Tiranga-Yatra

आपरेशन विंदूर पर अज्ज थमां 11 दिनें दा राष्ट्रव्यापी संपर्क अभियान शुरू कीता गेआ ऐ। मुख् रूपै नै तिरंगा यात्रा दे नां दा एहू अभियान पाकिस्तान खलाफ भारती सेना दी सफलता गी लोकें तगर पुज्जोग। इस कार्जक्रम च साबका फौजी, सामाजिक कार्यकर्ता, सामाजिक संगठन ते बीजेपी दे प्रमुख नेता शामिल होडन। एहू अभियान 23 मई तोड़ी चलोग। इस च दस्सेआ जाग जे कियां भारत नै पाकिस्तान ते पाकिस्तान दे कब्जे आहले जम्मू-कश्मीर च आतंकवादी शिविरें दा सफाया कीता।

<><><><><><>

Ports

भारत दे प्रमुख बंदरगाहें पिछले माली बरे च माल प्रबंधन च काबले जिक्र बाद्दा दर्ज कीता ऐ। बंदरगाह जहाजरानी ते जलमार्ग मंत्रालय नै इक बयान च आखेआ जे देश दे बंदरगाहें माली बरे 2023-24 च 819 मिलियन टन माल प्रबंधन कीता जेडा माली बरे 2024-25 च बढ़िये 855 मिलियन टन होई गेआ। एहू 4 अशारिया 3 फीसद दी सालाना वृद्धि गी दर्शादा ऐ। इस उपलब्धि पर खुशी जाहिर करदे होई बंदरगाह, जहाजरानी ते जलमार्ग मंत्री सर्बानंद सोनोवाल होरें आखेआ जे

बंदरगाह दे बुनियादी ढांचे की आधुनिक बनाने, परिचालन दक्षता बढ़ाने से निजी क्षेत्र की भागीदारी की बढ़ावा देने लैई मंत्रालय दे लगातार प्रयासें कर्ने देश दे समुंद्री क्षेत्र च अभूतपूर्व बाढ़ा दर्ज होआ ऐ।

<><><><><><>

Khelo-India

खेलो इंडिया यूथ गेम्स च अज्ज राजस्थान नै साइकलिंग टाइम ट्रायल श्रेणी च क्लीन स्वीप कीता ऐ। जागतें की श्रेणी च 30 किलोमीटर की द्रौड़ च सब्बै तगमे राजस्थान दे खडारियें जित्ते ना। इयां गै कुड़ियें की श्रेणी च 20 किलोमीटर साइकलिंग च राजस्थान की मंजू चौधरी होरें सुन्ने ते राजस्थान की गै रूकमणि होरें कैऽ दा तगमा अपने नांऽ कीता ऐ। अज्ज दे मकाबले दे बाद राजस्थान नै कर्नाटक की पिच्छे छोड़ी दित्ता ते 35 तगमें जिस च 26 सुन्ने ते 8 चांदी दे तगमे नै दुए ते महाराष्ट्र पैहली थाहर पर बने दा ऐ।

<><><><><><>

Equity-Indices

बाम्बे स्टॉक एक्सचेंज दा सेन्सेक्स अज्ज कोई डेढ फीसद की गिरावट कर्ने बंद होआ। कल दे उछाल दे बढ़ा अज्ज बजार च मुनाफा वसूली दा रूख रेआ ते निवेशक किश हद तगर एहतियात बरता'रदे ना। सेन्सेक्स 1 ज्हार 282 अंक यानि 1 अशारिया 5-5 फीसद खल्ल आइयै 81 ज्हार 148 पर बंद होआ। नेशनल स्टॉक एक्सचेंज दा निफ्टी 346 अंक यानि 1 अशारिया 3-9 फीसद खल्ल आइयै 24 ज्हार 578 पर बंद होआ।

<><><><><><>

Terrorists-Killed

जम्मू-कश्मीर च शोपियां जिले च शुक्रू केलर जंगली इलाके च अज्ज बडुलै सुरक्षाबलें कर्ने छिड़े दे टाकरे च 3 आतंकवादी मारे गे। कश्मीर दे पुलस महानिरीक्षक वी.के बिरदी होरें आकाशवाणी

समाचार श्रीनगर गी दस्सेआ जे मारे गेदे आतंकवादी लश्कर-ए-तैयबा या टीआरएफ गुट दे होई सकदे ना। इंदी पंछान कीती जा रदी ऐ।

<><><><><><>

Punjab-Hooch Tragedy

पंजाब च बिसली शराब पीने कन्नै मरोने आहलें दी गिनतरी 17 होई गई ऐ ते कई होरनें अजे बी अस्पताल च भर्ती ना। एहू घटना अमृतसर दे मजीठा विधानसभा खेत्तर च होई जित्थे 4 ग्राएं दे लोकें कल रातीं इथेनॉल नै बनी दी नकली शराब पी लैती ही। मृतकें दे परोआर जनें नै मिलने दे बाद मुखमंत्री भगवंत सिंह मान होरें आखेआ जे जिम्मेदार लोकें गी बखशेया नेई जागा। तोआई 2 आबकारी अधिकारियें, इक पुलस उपाधीक्षक ते 1 थाना प्रमुख गी सस्पेंड कीता गेआ ऐ। हुनै तोड़ी सरगना समेत 10 लोकें गी गिरफ्तार कीता गेआ ऐ। मुखमंत्री होरें मृतकें दे परिजनें गी 10 लख रुपे दी सिंधी सहायता ते परोआर दे इक्क सदस्य गी नौकरी देने दी बी घोषणा कीती।

<><><><><><>

IMD-Weather

दक्खन-पच्छम मानसून, बंगाल दी दक्खनी खाड़ी, दक्खनी अंडमान सागर, निकोबार द्वीप समूह ते उत्तरी अंडमान सागर दे किश हिस्सें बक्खी बदी गेआ ऐ। निकोबार द्वीप च पिछले 24एं घंटें च मध्यम थमां तेज बरखा होई ऐ। पिछले 2 दिन बी बरखा होई ही। मौसम विभाग नै दस्सेआ ऐ जे अगले 3-4 दिनें तोड़ी मानसून दे होर अगगे बदने लेई हालात अनुकूल ना। एहू दक्खन अरब सागर, मालद्वीप, कोमोरिन दे होर मते हारे खेत्तरें अंडमान-निकोबार द्वीप दे बाकी दे हिस्सें ते बंगाल दी खाड़ी दे मध्य हिस्सें दे किश होर हिस्सें तोड़ी पुज्जी जागा। पच्छम बंगाल दे गंगा आहले खेत्तर ते उप हिमालय खेत्तरें च ते झारखंड च अगले 2 दिनें च बक्ख-बक्ख थाहरें पर लू चलने दी मेद ऐ।

<><><><><><>

CBSE-Results

केंद्री माध्यमिक शिक्षा बोर्ड यानि सी.बी.एस.ई नै 10मीं दे 12मीं जमात दे म्तेयाने दे नतीजे दी घोषणा कीती ऐ। 12मीं च 88 इशारिया 3-9 प्रतिशत विद्यार्थी पास होई गे न जेडे पिछले बरे दे मकाबले च 0.41 प्रतिशत अंके दी बद्दोबद्दी दर्ज कीती गेई ऐ। कुड़ियां फी मुड़ें थमां अगगे रेहियां न ते 5. 94 प्रतिशत अंके कन्नै बेहतर प्रदर्शन कीता ऐ। 91 प्रतिशत शा मते विद्यार्थी इस परीक्षा च पास होए न। ट्रांसजेंडर विद्यार्थी बी 100 प्रतिशत पास होए न। 10मीं म्तेहान च 93.66 प्रतिशत विद्यार्थी पास होए न जेडे पिछले बरे दे मकाबले च 0.06 प्रतिशत बद्द न। 10मीं दे म्तेहाने च बी कुड़िये-मुड़ें गी पिच्छे छोड़ी दित्ता ऐ।

<><><><><><>

CS-Nowshera Visit

मुख सचिव अटल डुल्लू होरें अज्ज नौशहरा सेक्टर दा दौरा लाया ते कब्जा रेखा कन्नै लगदे इलाके च पाकिस्तान आसेआ आसेआ कीती गेदी गोलाबारी कन्नै प्रभावित लोकें कन्नै मलाटी कीती। उनें रिहायशी इलाके दा बी दौरा लाया जित्थें पाकिस्तान आसेआ कीती गेदी गोलीबारी दे कारण घरें गी नुकसान पुजा ऐ। मुख सचिव होरें आखेआ ऐ जे कब्जा रेखा दे कन्नै-कन्नै 9 ज्हार शा मते बंकर बनाए गेदे न ते औने आहले समें च होर बी बंकर बनाए जाडन। डुल्लू होरें लोकें गी भरोसा दोआया ऐ जे उंदी संपत्तियें दा जेहड़ा नुकसान होआ ऐ, ओहदा बद्द शा बद्द मुआवजा दित्ता जाग।

<><><><><><>

Haj-Pilgrims

रामबन दे राजस्व मैहकमे दे असिस्टेंट कमिशनर शाकत हायात मट्टू होरें 11 महिलाएं समेत 33 हज यात्रियें दे इक जत्थे गी झंडी दस्सियै रवाना कीता। हज यात्री कल श्रीनगर थमां दो डुआरियें राहें हज यात्रा लेई साउदी अरब लेई रवाना होडन। शोकत मट्टू होरें हज यात्रियें गी बदाई दित्ती ते उंदी सुरक्षित ते आरामदय यात्रा दी कामना कीती। उनें हज यात्रियें गी आखेआ जे ओहू जम्मू-कश्मीर दी सुख, शांति आस्तै दुआ करन। हज यात्रियें गी उंदे रिश्तेदारें, दोस्तें ते मन्ने-परमन्ने दे लोकें विदा कीता। दुई बक्खी किश्तवाड़ दे डिप्टी कश्मिनर राजेश कुमार शवन होरें बी किश्तवाड़ थमां हज यात्रियें दे

इक जत्थे गी झंडी दस्सियै रवाना कीता। इस जत्थे च 31 हज यात्री हे जिंदे च 10 महिलां ते 21 मर्द शामिल न जिनेंगी बस्सें राहें श्रीनगर दे हज हाउस लेई रवाना कीता जित्थू ओह कल श्रीनगर अंतरराश्ट्री ब्हाई अड्डे थमां साउदी अरब लेई रवाना होडन।

<><><><><><>